



سيارن اخبار
PRESS RELEASE

KEMENTERIAN KESIHATAN • Jalan Menteri Besar, Bandar Seri Begawan BB3910, Negara Brunei Darussalam.
Tel: 2381640 samb./ext. 7734 • Faks/Fax: 2383016 • E-mel/E-mail: prohealth@brunet.bn

SIARAN AKHBAR

**PERUTUSAN
YANG BERHORMAT DATO SERI SETIA
DR HAJI MD ISHAM BIN HAJI JAAFAR
MENTERI KESIHATAN**

SEMPENA HARI PENDERMA DARAH SEDUNIA 2025

**TEMA:
"DERMA DARAH, BERI HARAPAN: BERSAMA KITA MEMBANTU
MENYELAMATKAN NYAWA"**

("GIVE BLOOD, GIVE HOPE: TOGETHER WE SAVE LIVES")

14 JUN 2025

1. Hari Penderma Darah Sedunia disambut setiap tahun di seluruh dunia pada setiap 14 Jun sebagai satu inisiatif global untuk meningkatkan kesedaran orang ramai tentang keperluan darah dan produk darah yang selamat dan mampan. Sambutan ini bertujuan untuk menzahirkan penghargaan dan merakamkan ucapan terima kasih kepada semua para penderma darah yang menderma secara sukarela, yang telah menyumbangkan darah mereka yang sangat bernilai untuk menyelamatkan nyawa insan-insan yang memerlukan, tanpa mengharapkan sebarang balasan.
2. Pada tahun ini, Pertubuhan Kesihatan Sedunia (WHO), bersama rakan-rakan kongsi serta seluruh komuniti global bersatu meraikan Hari Penderma Darah Sedunia dengan membawa tema dan slogan **"Give Blood, Give Hope: Together We Save Lives"** atau **"Derma Darah, Beri Harapan: Bersama Kita Membantu Menyelamatkan Nyawa"**. Slogan kempen ini mengetengahkan impak sumbangan

penderma darah yang telah membawa perbezaan yang besar dan memberikan anugerah kehidupan dengan membawa harapan baru kepada golongan yang memerlukan. Setiap satu kehidupan adalah berharga dan layak diselamatkan. Tema ini juga bertujuan untuk meraikan aktiviti kemanusiaan dalam meningkatkan perpaduan dalam kehidupan bermasyarakat agar kekal bersatu dan bertanggungjawab untuk menyelamatkan nyawa melalui pendermaan darah tanpa mengira budaya, agama dan bangsa. Kempen ini juga diharap dapat memberi inspirasi kepada orang ramai yang layak khususnya golongan belia, untuk mula menderma darah dengan mengetengahkan kisah individu yang telah diselamatkan melalui pemindahan darah, serta pengalaman peribadi daripada para penderma sendiri.

3. Objektif khusus sambutan Hari Penderma Darah Sedunia pada tahun ini bukan sahaja untuk merakamkan penghargaan dan mengiktiraf penderma darah sukarela yang telah menyumbang secara signifikan kepada kesihatan dan kesejahteraan rakyat di negara ini, bahkan untuk mencapai matlamat- matlamat berikut:

- Meningkatkan kesedaran masyarakat mengenai keperluan menderma darah dan plasma serta impak positifnya terhadap kesejahteraan pesakit;
- Menggalakkan penderma darah yang baru mahupun sedia ada untuk menderma darah secara aktif demi memastikan bekalan darah yang mencukupi dan mampan;
- Mengetengahkan impak positif pendermaan darah kepada kesihatan dan kesejahteraan orang lain dan mempromosikan nilai-nilai perpaduan dan belas kasihan melalui pendermaan darah; dan

- Menggalakkan sokongan berterusan daripada agensi-agensi kerajaan dan rakan-rakan kongsi untuk terus bekerjasama ke arah program darah kebangsaan yang mampan, bagi mencapai akses universal kepada pemindahan darah yang selamat.
4. Alhamdulillah, aktiviti-aktiviti dan kempen pendermaan darah rancak diadakan secara berterusan di Negara Brunei Darussalam. Kementerian Kesihatan melalui Pusat Pendermaan Darah di Jabatan Perkhidmatan Makmal sentiasa bekerjasama dengan agensi-agensi Kerajaan, institusi-institusi pendidikan, pasukan seragam, sektor swasta dan badan-badan bukan kerajaan (NGO) untuk menyelaraskan dan mengendalikan kempen-kempen pendermaan darah di semua daerah di negara ini. Pada tahun 2024, Pusat Pendermaan Darah telah mencatat sebanyak 17,380 kutipan darah yang disumbangkan oleh 13,393 penderma darah, termasuk 3,774 penderma darah baru yang berdaftar. Alhamdulillah, Negara Brunei Darussalam telah mencapai kadar pendermaan darah sebanyak 2.9% pada tahun 2024 sejajar dengan trend pencapaian yang konsisten sejak dari tahun 2014. Pencapaian ini adalah juga seperti yang telah disarankan oleh pihak Pertubuhan Kesihatan Sedunia (WHO) iaitu pencapaian tahunan jumlah penderma darah dalam lingkungan 1-3% dari jumlah keramaian penduduk bagi memenuhi keperluan negara dalam menangani situasi kecemasan.
5. Dalam memastikan pencapaian ini sentiasa dikekalkan, Pusat Pendermaan Darah akan terus proaktif dalam mempelawa dan menggalakkan penganjuran kempen-kempen pendermaan darah secara sukarela, dengan tujuan bagi memperkasakan dan

memperluaskan lagi aktiviti seumpamanya. Di samping itu, Pusat Pendermaan Darah di Hospital Raja Isteri Pengiran Anak Saleha dan Tabung-Tabung Darah di semua Hospital Daerah juga terus berusaha untuk menyediakan bekalan darah dan produk darah yang mencukupi dan selamat, yang merupakan salah satu komponen yang penting dalam memastikan keberkesanan sistem kesihatan di Negara ini.

6. Dalam usaha Kementerian Kesihatan untuk memastikan akses universal kepada pemindahan darah yang selamat di Negara ini, sebuah projek dibawah Rancangan Kemajuan Negara Kedua Belas (RKN12) dalam pembinaan Pusat Darah Kebangsaan (*National Blood Centre*) telah pun diluluskan. Pusat ini akan menyediakan persekitaran yang selamat dan kondusif bagi menempatkan sebuah *suite* pendermaan darah termasuk ruang pemeriksaan berasingan dan ruang rehat yang khusus bagi meningkatkan aksesibiliti penderma darah dan keramaian penderma *walk-in*. Disamping itu, pusat ini akan dilengkapi dengan fasiliti Makmal yang terlibat dalam pendermaan darah '*centralised laboratories for blood donation testing*' seperti Makmal Saringan Pendermaan Darah, Makmal Pemprosesan Darah, Makmal Pemeriksaan Kualiti Darah serta ruang penyimpanan bekalan darah yang lebih teratur mengikut piawaian antarabangsa.
7. Dikesempatan ini, Kementerian Kesihatan ingin merakamkan setinggi-tinggi penghargaan kepada setiap penderma darah di Negara Brunei Darussalam iaitu wira-wira yang telah menyumbangkan masa dan tenaga secara sukarela demi untuk membantu menyelamatkan pesakit-pesakit yang memerlukan.

Kementerian Kesihatan juga ingin mengucapkan ribuan terima kasih kepada agensi-agensi Kerajaan, institusi pendidikan, pasukan-pasukan berseragam, sektor swasta dan badan-badan bukan kerajaan (NGO) serta individu-individu perseorangan yang turut sama terlibat dalam melaksanakan aktiviti-aktiviti dan menganjurkan kempen-kempen derma darah selama ini. Tidak juga dilupakan ucapan setinggi-tinggi penghargaan dan tahniah kepada semua pegawai dan kakitangan di Pusat Pendermaan Darah Hospital Raja Isteri Pengiran Anak Saleha dan Tabung-Tabung Darah di Jerudong Park Medical Centre, Hospital Suri Seri Begawan, Hospital Pengiran Muda Mahkota Pengiran Muda Haji Al-Muhtadee Billah dan Hospital Pengiran Isteri Hajjah Mariam di atas usaha yang berterusan dan tidak henti-henti dalam memastikan bekalan darah yang selamat sentiasa mencukupi. Semoga segala sumbangan ikhlas dan budi baik akan mendapatkan balasan dari Allah Subhanahu Wata'ala jua.

8. Sempena sambutan Hari Penderma Darah Sedunia ini, marilah kita bersama-sama meningkatkan kesedaran mengenai kepentingan perpaduan dan semangat kebersamaan dalam usaha memastikan bekalan darah sentiasa mencukupi dan selamat, melalui aktiviti-aktiviti pendermaan darah secara sukarela dan berterusan. Hanya dengan ini, akses kepada bekalan darah yang mencukupi dan tepat pada masanya akan dapat terus dinikmati oleh para pesakit yang memerlukannya. Saya juga menyeru dan menggalakkan individu yang belum pernah menderma darah untuk tampil dan menyertai usaha mulia ini demi kebaikan dan kesejahteraan bersama.
9. Orang ramai bolehlah mengikuti laman akaun sosial rasmi iaitu Facebook: [bloodbankripas.brunei](https://www.facebook.com/bloodbankripas.brunei) atau Instagram

@bloodbank_ripas untuk mengetahui maklumat terkini mengenai aktiviti-aktiviti Pusat Pendermaan Darah. Bagi mendapatkan slot perjanjian menderma darah di Pusat Pendermaan Darah Hospital Raja Isteri Pengiran Anak Saleha, orang ramai bolehlah menempah slot melalui aplikasi BloodKad atau menghubungi Pusat ini di talian 2242424 sambungan 5745 / 6001 atau 7440267 / 7440277 (Hotline/Whatsapp).

-TAMAT-